



Centro di Control di
Cacho ta cuminsa cu
proyecto piloto di
microchipping

P.9

Problemanan
interno birando
problema grandi
pa existencia di
gobierno

P.15

Ta alarmante
cu 95% di
comunidad
su placa no
ta yega

P.5



The #1 Payroll & HRM Software in the Caribbean



- Easy to Use & Always Accurate
- Complete Integration of HRM & Payroll
- 24/7 Support from Local Specialists
- On-premise or Cloud
- All Types & All Sizes of Companies Incl. Government

Payroll Pro
HRM



VCC
International NV

**REAL SOFTWARE
REAL SUPPORT**
www.vcc-int.com

Tel. 583-7072 | info@vcc-int.com | www.vcc-int.com

get a quote

make a payment

sign up



Quick and easy!


Guardian Group
Future

live safe | live easy


myguardiangroup.com

LOCAL

Gobierno tin cu aclaria pa pueblo

Aumento di BBO proponi lo produci mesun suma di placa cu BTW

Segun Prome Minister Evelyn Wever Croes, e efecto inflatorio di introduccion di BTW di entre 6 pa 14% ta cuater biaha mas halto compara cu introduccion di un aumento di 1% te cu 1.5% di BBO.

Esaki el a trece dilanti den conferencia di prensa extra ordinario cu gobierno a organisa diahuebs merdia pa anuncia cu BTW lo no drenta na vigor mas pa dia prome di januari 2023.

Un declaracion cu tabata contene hopi puntonan controversial, expresionnan caminda Prome Minister tabata contradeci su propio expresionnan riba loke ta su gobierno su intencion riba e asunto di aumento di BBO.

Na inicio di su declaracion, Evelyn Wever Croes a mostra riba e efecto inflatorio cu BTW lo a ocasiona compara cu e vision nobo di su gobierno pa aumenta BBO cu 1% te ci 1.5%, cu segun e mandatario, e BTW lo tin un efecto cuater biaha mas hopi cu e plan nobo di su gobierno.

Sinembargo durante di preguntanan di miembronan di prensa haci na Prome Minister, el a bisa net lo contrario, ora cu e representante di 24Ora, sr Marko Espinoza a puntra si e aumento di BBO proponi lo iguala e suma di 160 miyon cu CAft a mostra den su carta na Juli ultimo, confirmando e suma aki cu e BTW lo mester a trece aden na 2023.

Na prome instante Minister Presidente a mostra cu ningun momento e BTW mester a produci 160 miyon, contra arestando pues loke CAft a pone su carta y loke ta su gobierno mes a informa e comision di supervision cu e lo logra esaki.

Segun Evelyn Wever Croes, BTW lo mester a trece 100 miyon den caha di gobierno pero na mes momento a declara cu esaki ta mesun suma cu e aumento di 1% te cu 1.5% di aumento di BBO) tambe lo trece aden pa gobierno, pues en realidad e ora no tin cambio.\

Si e aumento di BBO proponi pa gobierno ta bay trece



mesun 100 miyon den caha di gobierno cu e BTW, anto realisticamente e cambio aki no ta make sense, ya cu no tin cambio y ta solamente e number di e impuesto ta cambia y net esaki ta loke 17 gremio a trece dilanti ayera tardi den nan conferencia di prensa.

Al contrario e pensamiento ta existi cu e cambio aki di BTW pa un aumento di BBO, lo bay trece ainda mas placa den caha di gobierno compara cu e BTW mirando e cantidad di schakelnan cu ta existi for di momento cu productonan yega e isla.

E grupo di 17 representantenan di gremionan sindical y comercial cu a reuni ayera, a mostra bon cla cu e plan di gobierno lo tin mesun efecto inflatorio cu pueblo ni comercio lo por carga a corto plaso ya cu e efecto inflatorio lo bay ta algo sin igual y lo crea hopi problema riba tereno economico y financiero.

Gremionan aki ta di mesun pensamiento cu CAft ya cu un di e problemanan mayor cu e comision di supervision tin cu gabinete Wever Croes pa loke ta e BTW ta e hecho cu ainda gobierno di Aruba no por duna un splicacion concreto kico e impuesto nobo aki lo bira, kico lo bay haci cu e placa y otro aspectonan financiero cu tin cu atende riba esaki.

Capitan Venezolano condena pa di dos biaha pa contrabanda di hende, incluyendo tres mucha

Na inicio di e aña un capitán Venezolano a trata di hinca 7 persona ilegal na Aruba. Entre nan tres mucha chikito. Pa colmo e mes ta ilegal y condena den pasado pa contrabanda caba. Su ayudante tambe ta indocumenta.

Durante tratamento di e caso Hues a bisa cu e ta tum'e na malo di a pone bida di e hendenan, principalmente tres mucha chikito na peligro.

Jose Gregorio Ventura Garces (41) y Luis Enrique Navo (36) a wordo deteni den luna di februari y a acusa nan di contrabanda di hende cu a tuma luga dia 17 di februari ultimo y posesion di arma di candela / municion.

E dia menciona a manda un metalshark di Kustwacht pa haf na Playa. A mira e boto La Reina, un poco sospehoso, bayendo direccion di Renaissance Marina. A mira cu tin dos persona abordo. Pero ora cu a yega cerca, a mira cu tin mas persona cu tabata drumi plat. Mesora a bay over pa control.

Den e boto tabatin en total 9 persona. Prome e capitan a bisa cu el a bay pisca pero cu tur e hendenan ilegal abordo, e no por a mantene e storia aki mucho largo. Aborda tabatin tres hende muhe, tres mucha menor di edad y un homber. E tres muchanan tabata cu nan wela.

Personal di Kustwacht a constata cu e boto falta hopi siguridad pa ta riba lama, pio riba lama grandi. A mira cu tabatin awa ta dreña den e boto.

Mientras cu a pone e hendenan un banda, a cuminsa rista e boto. A bin descubri un paki cu no tabata contene droga pero un revolver y municion (46 patronchi en total). Un arma cu ni un hende den e boto a mira of sa di kende e ta. Ni e capitan y su tripulante. Segun nan ta bisa, prome cu nan a sali cu e boto for di Mangel Halto a revisa esaki bon pa mira cu tur cos tabata na ordo. Y a bisa cu tabatin salbabida.

Den e relato tabata para cu no tabatin suficiente zwemvest, no tin radio ni sistema di GPS y tampoco un pomp pa saca awa. Hues a mustra e acusadonan cu si pa accidente un di e hendenan cay den lama e chens

pa sobrevivi sin zwemvest ta masha chikito. Y pa no papia di un mucha mes. "Bo a tuma hopi riesgo," Hues a bisa e capitan.

Jose Gregorio a presta e boto for di e doño pa test of drech'e. Segun e doño, e no a dun'e permiso pa nabega cu esaki pasobra e no ta den condicion, y tampoco pa bay busca hende riba lama grandi. Di e armanan tampoco e sa algo. Por lo menos, e no ta di dje.

Segun e diferente declaracionnan duna, e grupo a subi un boto na Venezuela y na mita caminda, a pasa riba La Reina. Esaki tabatin dos motor, pero di cual uno so tabata funciona. E otro tabata uza pa pomp awa saca for di e boto.

Loke cu a resalta ta cu abordo di e nave tabatin un señora di edad cu su tres nietanan cu a pasa den travesia aki den un forma masha peligroso, pasobra e boto no ta den condicion pa nabega. Ta un milagro cu nan a logra yega Aruba.

Jose Gregorio tin casi un aña na Aruba y a yega di wordo condena caba pa contrabanda di hende. E tabata kier a busca su amiga, kende el a conoce via di Facebook ora cu e tabata na Aruba. Luis Enrique a bisa cu e tabatin apenas tres luna na Aruba.

Fiscal a bisa e acusadonan cu e ta tuma nan hopi na malo pa e aventura aki unda cu a pone bida di adulto y tres mucha na peligro. E boto no tabata apto tampoco pa subi lama.

Pa e parti di e posesion di arma, e dos acusadonan ta bisa cu nan no sa di esaki. Como cu no tin prueba, el a pidi pa declara nan liber di e acusacion aki. Pa Luis Enrique, el a pidi un castigo di 18 luna y pa Jose Gregorio, kende ta conoci pa husticia caba a pidi 24 luna.

Hues, despues cu e acusadonan no tabatin mucho di bisa, a cera tratamento di e acusado y a dicta sentencia di biaha. El a haya nan culpabel di solamente contrabanda y a bay di acuerdo cu e castigo existi door di Fiscal, esta 18 y 24 luna pa e dos acusadonan. Ambos a acepta e castigo y a bisa cu lo no apela.

LOCAL

Accidente cu tres persona herida den bocht na Franse Pas



Diadomingo atardi algo pasa di 5:30 polis y ambulance a bay direccion Franse Pas, pa ta exacto den bocht unda antes hopi auto tawata accidenta.

Na yegada di polis ambulance ya tawata na e sitio dunando asistencia.

E dos autonan involvi tawata un Nissan Sunny y un Hyundai i 30.

Den e Hyundai tawata tin e personanan herida. Den e mesun auto tawata tin un baby y danki Dios e tawata den su child seat y no a resulta herida.

Paramediconan na e sitio mester a atende un otro persona cu a resulta herida na cabes.

E accidente a sosode momento cu e Nissan Sunny lo a perde control y dal contra e Hyundai.

Chauffeur di e Sunny a baha bay sinta den mondi y despues Paramediconan a bay papia cu ne tambe.

A bin resulta cu e mes no a resulta herida, polis a dicidi di haci un test di alcohol cu ne y a resulta cu e tawata bou influencia. Eynan mes e la wordo deteni y hiba warda di San Nicolas.

Na e sitio a presenta dos ambulance pa atende cu e personanan herida, unda cu tres hende a wordo hiba Eerste Hulp atencion medico avansa.

Lider di AVP, Mike Eman

Ta alarmante cu 95% di comunidad su placa no ta yega pa cumpra loke tin mester

E impacto di mal gobernacion di gabinete Wever Croes ta hincando pueblo den rumbo di pobresa, rumbo di un futuro domina pa incertidumbre y un calidad di bida cu ta sigui deteriora pa un inflacion ocasiona pa un falta di vision di e actual gobierno.

Lider di partido AVP y Parlamentario Mike Eman, a mostra cu e ultimo rapport di Banco Central di Aruba, ta papia palabra cla y na mes momento ta lanta preocupacion grandi den gremionan cu ultimo dianan tambe a cuminsa mira cu e rumbo cu e pais ta bayendo, no por continua den e forma aki.

“E rapport di BCA, esta ‘Consumer Confidence Survey Report’ tma riba e segundo kwartaal di 2022, a produci cifranan sumamente preocupante y un pueblo cu ta mirando cu e ta bayendo atras den loke ta su situacion financiero.

Ta algo hopi serio pa tuma nota cu den e rapport aki, a bin Sali na cla den e sondeo cu a wordo haci den comunidad, cu 95% di tur hende entrevista, a admiti cu den ultimo seis luna di 2022,

nan por cumpra menos cu nan placa compara cu seis luna atras, pues un decadencia sin duda impresionante.

Ora cu tuma nota di e informacion aki di BCA, mustrand cu 95% di hendenan ta confirma cu nan a bay atras den loke nan placa por cumpra, ta practicamente henter Aruba nos ta papiando di dje, nan ta sinti cu nan poder di compra a bay atras.

Pero gobierno aki, loke e tin pa pueblo den proximo lunanan, no ta un reparacion di poder di compra, manera gobierno di AVP a haci presentando un ‘reparatietoeslag,’ a bin un ‘schoolkinder toeslag,’ a bin indexering, a bin ‘inhaalmanoeuvre’ tambe a bin descuento pa studiantenan ora cu nan tin cu paga nan studielening bek.

No loke e gobierno aki tin ariba e redoblacion di BBO na 2017, placa extra cu a wordo pone riba accijns di gasolin, ta un introduccion di un BTW, cu awor ta wordo cambia den un aumento un biaha mas di BBO di 1% te cu 1.5% y con cu nan yame, esta BTW of un aumento dramático di BBO, cada un di nan lo bay afecta e poder di compra di nos conciudadanan.



Si cu gobierno a introduci un di e dos medidanan aki, e rapport di BCA ta mostra cu na e momentonan aki, 95% di poblacion di nos pais, ya su placa no ta yega pa hiba mesun bida cu e tabata hibando seis luna pasa of prome cu esey.

No ta Mike Eman of partido AVP ta bisa esaki pero Banco Central ta confirma loke gremionan den ultimo dianan tambe a bin ta mustrand nan preocupacion grandi pa e forma di goberna di un gabinete Wever Croes II cu no kier drecha su maneho manera cu nan a palabra cu Hulanda pero kier sigui sirbi nan propio interes di famia y amigonan mientras cu 95% di nos poblacion ta mustrand caba cu placa no ta yega pa mucho cos mas.

E hendenan cu BCA a entrevista, a vocifera nan preocupacion cu e direccion economico cu e pais ta bayendo, ya cu nan ta mira un decadencia, nan ta preocupa cu nan propio economia di cas y mas ainda 95% di nan ta preocupa cu nan poder di compra unicamente ta bayendo atras,” lider di AVP, Mike Eman a declara.

LOCAL

Actividadnan politico na cantidad den fin di siman

Problemanan interno birando problema grandi pa existencia di gobierno

Otro fin di siman tras di lomba caminda por a tuma nota di un cantidad di actividad politico tumando luga, reunionnan na cas di parlamentario- y ministernan, reuniendo riba posibel cambionan cu ta na caminda dentro di poco.

E impresion mas concreto ta cu gabinete Wever Croes II ta colgando na un hilo, sperando riba e sentencia di RMR di Hulanda dentro di poco pero cu hopi iritacion dentro di e propio consejo di minister pa algun tempo caba.

Friccionnan interno cu ta sigui crece, cu ta sigui bira mas serio y cu por conduci na un kiebro den seno di e partido geel, caminda un di e indicacionnan mas concreto, ta e serie di reunion di contacto cu ta inicia for di diabierna anochi caba den varios bario y na cas di famianan di e actual ministernan, caminda a mustra riba e desconfianza cu a bin ta creciendo den seno di e partido.

E decision di Minister Presidente y lider di MEP, Evelyn Wever Croes di yama un conferencia di prensa diabierna ultimo pa anuncia cu gobierno no ta bay introduci BTW pa dia prome di januari 2023, awor ta Sali na cla cu ta un decision sin consulta den henter e consejo di minister, tumando decisionnan unilateralmente dor di e lider di partido.

Den fin di siman tambe e otro partner di e coalicion, esta RAIZ tambe lo a tene dos reunion di contacto sigur, sin conocimiento of aprobacion di e lider y Minister Ursell Arends, pa loke ta regarda e decision di pone posicion di e partido pone un banda, sin consulta cu miembronan of manera Arends mes ta bisa, e plataforma di partido RAIZ.

Loke ta ser cuestiona den propio seno di e partido chikito aki, ta e hecho cu e punto principal di e acuerdo di gobernacion firma na San Nicolas, ta cu RAIZ tin cu para ariba cu tur acuerdo firma cu Hulanda, tin cu wordo respeta y ehecuta pero awor e propio lider di partido, sin consulta previo, a dicidi di pone e punto concreto aki di e partido pa firma parti di gabinete Wever Croes II, un banda sin cu e por hustifica su decision.

RAIZ a sostene semper e pensamiento caminda tin cu permiti envolvimento di Hulanda pa drecha e situacion financiero di e pais, pa cual motibo el a bira un di e puntonan principal



di e acuerdo di gobernacion cu partido MEP pero awor ta parce cu lider di e partido Ursell Arends, awor cu el a bira Minister, a dicidi di sacrifica vision di su partido y viola e acuerdo di gobernacion cu e mes a firma.

Den seno di e partido na e momentonan aki, tin hopi discordia, hopi votadonan cu no a sostene e forma con principalmente Minister Arends ta actuando como miembro di e consejo di minister pero tambe tin miembronan cu no ta haya e rol cu nan dos parlamentarionan ta hungando den Parlamento, esun di mas integro, ya cu nan ta mas tanto dos marioneta den un grupo di 9 miembro di fraccion di MEP.

Den fin siman mescos cu pa varios siman y luna caba, partido AVP a sigui reuni cu hendenan den bario, cu varios reunion di contacto, hibando informacionnan pa pueblo, informacion cu no ta mucho alentador pero caminda miembronan di e partido berde ta mustRANDO pueblo cuanto por ser haci sin cu gobierno ta mishi cu cartera di pueblo.

Reunionnan cu a cuminsa haya mas atencion y mas asistencia ya cu e situacion financiero di mayoria di famia riba e isla, ta bayendo di mal pa pio y ta algo cu no por keda asina y AVP lo sigui cu e actividadnan aki den e dianan dilanti, tratando di motiva pueblo cu tin cambio na caminda, cu tin solucion cu no ta inflacion, cu lo bay reina tranquilidad atrobe rond di e pais.

Prome Minister ta sigura cu lo duna rapport di Arubahuis ora e ta cla

Manera cu ta conoci tin investigacion cu ta andando na Arubahuis cual Prome Minister Evelyn Wever-Croes a inicia cu ne.

Na varios ocasion Prome Minister a splica cu na e momento cu a bin na su conocimiento cu tin algun cos cu no lo ta bayendo bon na Arubahuis, como e minister encarga cu Arubahuis, a pidi Centrale Accountantsdienst (CAD) pa haci un investigacion.

E investigacion aki ta andando ainda keto bay, e ta den su fase final, pues mientrastanto no tin mas informacion 'nobo' acerca di e tema aki.

Premier Wever - Croes a informa cu e investigacion ta wordo tuma hopi serio y tur esnan cu ta haciendo e investigacion ta dedicando hopi tempo na esaki.

Prome Minister como e persona cu a inicia cu e investigacion ta sigura cu asina cu e investigacion y e rapport ta full cla, lo informa Parlamento di tur loke cu

a pasa.

Prome Minister ta enfatisa: "Mi mes ta esun cu a cuminsa e investigacion aki, y mi mes lo ta esun cu lo duna transparencia ora e investigacion keda cla"

"A pesar di e transparencia aki ta tuma nota cu oponentenan politico un bes mas ta trata di haci politikeria cu algo serio, kier trata di accelera e proceso of desvia atencion di locual nan mes tin andando."

Pa cualkier motibo cu e ta, Prome Minister Wever - Croes ta pidi pa duna tempo su tempo. Alabes ta sigura cu ora e investigacion ta cla, Gobierno lo duna mas informacion y por comenta mas di e contenido di e investigacion.

APPAREL

BOAT ACCESSORIES

TODOMAR

f TodomarAruba @TodomarAruba TodomarAruba +297 585 0555

FISHING TACKLE

FIBERGLASS PRODUCTS

INVEST SECURE N.V.
We don't just say it... We Guarantee it!!!

**PROTECT YOUR RESIDENCE,
GROW YOUR BUSINESS, not your risks**

By using the right tools, people and procedures, our security teams can assist you, giving a clearer view of your risks, ensure appropriate security investment and demonstrate value to what matters most to you.

**With more than 20 years of experience,
we are committed to the profession**

Call us for a free estimate at:
Tel: 582-7252 or Email: insec@setamet.aw

LOCAL

Team di Hulanda a bin controla trabou den ehecucion di Landspakket

Durante siman di 15 te 19 di augustus e ekipo di Aruba encarga cu landspakket a ricibi bishita di e asina yama Tijdelijke Werkorganisatie di Hulanda (TWO-NED). Durante e bishita aki, cu regularmente ta tuma luga cada kwartaal, ta evalua progreso di tur tema di landspakket y a traha riba e di cuater Agenda di Ehecucion pa aña 2022. Durante e bishita a para keto tambe na algun tema clave, incluso forma di traha, reto cu ta experiencia durante ehecucion y punto di atencion.

E siman a cuminsa cu reunion pa trata thema H di landspakket cu ta referi na reforsamento di estado di derecho. Asina a trata topiconan manera ley relaciona cu proteccion di informacion, proyecto di vigilancia di frontera y ahustacion di fondo di criminalidad.

A trata tema A2 unda a para keto na e progreso haci pa locual ta estadistica di Aruba y reforsamento di esaki unda cu recientemente minister di Asuntonan Economico a publica e rapport di implementacion di NSS.

Adicionalmente a para keto na e maneho completo di culmina financiero di pais Aruba unda a trata e asina yama Roadmap cu ta duna indicacion di accion concreto cu a tuma y lo ta tumando luga conduciendo na finanzas publico duradero. Un otro tema cu tin hopi interes p'e ta preparacionnan pa locual ta trayecto E1 y E4 cu ta trata reforma di mercado laboral como tambe reforma di e sistema di siguridad social. Den cuadro di reforma cu ta tumando luga den sector economico a papia riba e trabounan pa locual ta 'Aruba Fair Trade Authority' cu bou di liderazgo di departamento di asuntonan Economico ya ta encaminando su etapa di implementacion.

Durante e dianan cu a sigui a trata extensamente e tema di reforma di aparato publico como tambe punto di atencion critico den cuadro di esaki. Di parti di e ekipo local a enfatisa e importancia di mantene y reforsa calidad di aparato gubernamental den cuadro di reforma. Otro aspecto critico cu a trata durante e bishita di trabou ta e capacidad legislativo di pais Aruba. Unda cu localmente a menciona cu varios reforma lo e.o. rekeri ahuste di ley local. Pa cu esaki a menciona cu mester reforsa y tene cuenta cu e capacidad legisaltivo di pais Aruba. Otro temanan cu tambe a bin na vigor durante e bishita tabata reforma fiscal, ensenanza, salubridad y digitalisacion. E bishita di TWO-NED a termina den forma ameno unda cu a haci palabracionnan fiho den direccion di e di cuater agenda di ehecucion di e trayecto di landspakket.

Asina aki ministerio di Asuntonan General ta termina pa bisa danki na e ekipo di Aruba y na tur esnan involvi pa e maximo esfuerzo asina dunando contenido na e accionnan stipula den cuadro di reformanan.



Centro di Control di Cacho ta cuminsa cu proyecto piloto di microchipping



Na comienso di augustus Centro di Control di Cacho a anuncia extencion di orario di servicio mirando e desaroyo positivo. Cu e extencion di orario di CCC, ta duna mas oportunidad pa esnan cu kier adopta un mascota.

Durante ultimo siman Centro di Control di Cacho a cuminsa cu e proyecto piloto di microchipping unda cu ta spera di aporta na hisa e grado di adoptacion na Aruba. Ora adopta via Centro di Control di Cacho, tin rekisitonan cu e doño nobo mester tene na dje, un di nan ta cu nan mester chip y sterilisa e mascota adopta y tambe trece prueba cu esaki dentro di dos luna. Esaki ta pa percura cu e doño responsabilisa su mes adecuadamente pa nan mascota.

Sterilisando bo mascota ora e cria no ta desea y microchip bo mascota ta yuda cu e problematica di

cacho (y pushi) riba caya. Esaki ta un di e meta nan cu Centro di Control di Cacho ta enfoca ariba. Na e momento nan aki e proyecto piloto ta enfoca riba e parti di microchip, y ta aplica pa e cachonan cu ta wordo adopta via Centro di Control di Cacho, na disponibilidad y evaluacion di veterinario di Gobierno. E programa piloto ta fungi tambe como fase di prueba pa e sistema di registracion digital cu ta den proceso pa wordo lansa y activa oficialmente.

E proyecto ainda ta den planificacion mirando cu ainda ta den proceso cu reunion cu stakeholders, veterinarianan y NGO's. Gobierno di Aruba ta spera di por lansa esaki cu un campaña nacional den e lunanan binidero.

Esaki lo wordo comunica via canalnan oficial di Gobierno di Aruba y tambe via Centro di Control di Cacho su pagina di Facebook.

SUCESO

Hoben di 16 aña hinca ta den situacion critico

Diadomingo algo prome cu 3'or di marduga, lo a surgi un pelea y cu a caba cu un hoben di 16 aña seriamente herida.

E hoben a ricibi 4 hinca den lomba, mesora a pidi pa polis y ambulance cu urgencia.

Na yegada di polis, a pidi pa presencia di Slachtofferhulp. Tambe a pidi pa presencia di recherche di Oranjestad y departamento tecnico di polis pa asina cuminsa cu e investigacionnan necesario.

Personal di ambulance a trata e hoben na e sitio y despues a transport'e cu urgencia pa hospital. E caso serio aki di hincamento ta den man di recherche di Oranjestad.

Ayera atardi ainda no a detene e sospechoso den e caso aki. Informacion no oficial ta indica cu e hoben a ricibi hincanan serio tanto na su pulmonnan y tambe higr y esakinan ta heridanan serio.

Cualquier persona cu por tin informacion, tuma contacto cu autoridadnan.



Scooter Sigma horta den madrugada

Horta den oranan di marduga: Doño kier su Sigma Scooter bek. Tin recompensa.

Den oranan di marduga polis a bay den area di Wu Di Supermarket situa pabou di rotonde di Dadelstraat, unda ladroncia di un Scooter a tuma luga.

Ta trata di un Modelo Scooter Marca Sigma Bouwjaar : 2017

Color: Zwart Rood Grijs/Preto/Cora/Shinishi

Nummer plaat : MFA-2698

E ladroncia a tuma luga entre 11:30 p.m y 1:38 a.m o sea diasabra anochi pa diadomingo marduga. Segun nos por a compronde esaki ta e di dos biaha cu Scooter ta wordo horta for di su doño.

Na april nan a horta un caba y awe un biaha



mas. **Si bo persona por a mira algo durante e ora ey den e area ey por please yama 100(polis) y/ of 7450620.**

Polis tin tur dato y lo no duro mucho cu lo pone man ariba e ladronnan.

Auto a pasa y los tiro na Tanki Leendert



Diadomingo marduga den careda di 4'or polis a bay un adres na Tanki Leendert, unda lo tabata tin un caso di tiramento. Na prome instante e patruya a bay un adres robes y tabata pita pero niun hende tabata sali, debi cu no tabata eynan.

Despues nan a move y a bay e adres corecto. Eynan e habitantenan a splica e dos agentenan kiko a sosode. Segun nos a compronde na e sitio un auto lo a pasa y den dje tabata tin mas cu dos persona. Un di e hendenan den e vehiculo lo a saca un arma y tira, aparentemente den halto.

Polisnan a cana unda e auto lo a para y los tiro pero no a bin topa cu ningun huls indicando cu e arma usa no ta di peña. Dado momento e comunicacion cu e agentenan a "tranca", debi cu segun e agentenan e hendenan lo no ta bisando tur cos. No a keda e dos agentenan nada otro di subi patruya y bandona e sitio. Pues pa autoridad of sea e dos agentenan ta keda un vraagteken di kiko exactamente a pasa cu e caso aki.



POLITICA

MEP na Parlamentario Lopez-Tromp:

E investigacion riba Arubahuis no ta cla ainda por lo tanto bo no por haya e rapport di CAD ainda



Partido MEP a tuma nota cu Parlamentario Marisol Lopez-Tromp, despues di a sali nervioso di bebe tiki koffie na Ministerio Publico diamars ultimo, a bira mas cabesura ainda. Parce e corona di kukwisa ta pisa mucho riba su cabes. Señora Lopez-Tromp di biaha manera cu el a sali di OM y a declara cu e ta sospechoso, a sali ta cuestiona un biaha mas riba investigacion di Arubahuis. Partido MAS a manda un di dos Rappel pa Presidente di Staten Señor Edgard Vrolijk pa asina haya e rapport di CAD riba Arubahuis.

Na esaki, Partido MEP ta contesta Parlamentario Lopez-Tromp y MAS, “Bo no por haya certificado sin completa e curso toch?”. Cu esaki Partido MEP ta aclarea, manera cu Prome Minister Señora Evelyn Wever-Croes a bisa den varios ocasion contestando señora Lopez-Tromp, e investigacion riba Arubahuis no ta cla ainda por lo tanto

señora Lopez-Tromp no por haya e rapport di CAD ainda.

Nos conseho pa señora Lopez-Tromp ta pa keda tranquil. E rapport lo sali manera e investigacion keda cla. Un investigacion cu Prome Minister di nos pais mes a laga haci.

Y lo bin na claridad e contenido di e investigacion den e rapport di CAD. Warda cu pasenshi pa nos profesionalnan haci nan trabou.

Un cos si nos por bisa señora Lopez-Tromp: “El que nada debe, nada teme’. Esun cu a sembra kukwisa, awe no por ta tranquil berdad. Sali cu cualkier disparate awo, ta muestra mas con nervioso bo consenshi ta. Partido MEP si lo warda cu pasenshi e resultado di e investigacion di caso Kukwisa. Y lo dal un copi koffie na bo salud”.

Minister Ursell Arends:

AVP su contribucion na e solucion; Politica Populista

Mi no por kere cu ta tur simpatizante di AVP kier pa Aruba sigi biba di placa presta. Mi ta kere nos tur por ta di acuerdo cu e 1 miyon florin pa dia cu nos mester pone un banda pa paga interes lo por a yuda soluciona hopi necesidad den nos pais. Pero den dos articulo tras di otro un miembro di parlamento di AVP ta insisti cu e unico solucion pa Aruba ta pa haci mas prestamo y sigi crece e debe nacional.

Mi a priminti votadornan di RAIZ cu nos no ta bai participa den e politica tradicional di tira lodo. Nos a bin pa Goberna y duna resultado. Nos no t'ey pa hunga e politico toxico di atakenan personal. P'esey mi no ta reacciona riba e insultonan cu e parlamentario ta insisti di keda lansa riba mi na nivel personal. Mi ta laga su forma di haci muera ta ken e ta. Su palabranan ta papia pa nan mes.

Pero ta hopi importante pa adverti nos pueblo cu e ruta aki di hiba oposicion y politica ta malo pa nos pais. E parlamentario ta declara den dos articulo tras di otro cu contrario na paga debe, Aruba mester sigi presta placa. E parlamentario di AVP no kier BBO, y no kier BTW. Pues no kier nada cu ta duna Aruba fondo pa paga debe bek.

Ta scucha palabranan: "Gobierno di AVP no a tuma medida, al contrario a busca solucionnan valido pa atende cu necesidad di e pais, a traha duro restaurando cantidad di scol, salba e fondonan di pensioen, a percura pa renobacion di hospital", etc.

Loke awe ta ser yama cu palabra bunita "solucion valido" ta nada otro cu prestamo, fianza y mas debe. Tur proyecto cu por menciona a wordo traha cu placa presta. E Parlamentario como ex-ministro a participa na e bonanza di gastamento di placa presta y lo mester por a pensa cu un dia ta e pueblo di Aruba lo mester paga bek. Awe e facturanan a cuminsa dreña.

Esey ta na interes so. Awo e facturanan di e debenan di mal maneho di gobiernonan anterior laga atras tambe a cuminsa dreña. Hulanda a bisa cla y raspa: "Aruba a traha e debe, ta Aruba mester paga e debe". E placa aki lo no bin for di Hulanda. Ta nos hendenan mester bai produci e placa pa paga e debe cu awe ta wordo scondi den e palabranan



"solucion valido". Y kico e partido mas grandi di oposicion ta propone awo? E solucion segun nan ta pa nos no paga y sigi traha mas debe.

Mi ta sigur cu mescos cu mayoria di Aruba no ta tur hende den AVP ta di acuerdo pa bai tras di oposicion populista y sigi presta placa. Ta ken lo kier bay den coalicion cu un partido cual pensamiento ta basa pa mas debe y no tin e curashi pa tuma decisionnan dificil pero realmente na bienestar di nos Pais. Puntra boso mes si e deseo pa mas debe realmente ta e deseo di henter AVP y di e comunidad cu AVP ta representa. Honestamente ami no por kere cu ta asina.

Den seno di AVP mester por splica su sostenedornan, cu e periodo di bonanza y gastamento di placa presta a pasa pa historia y cu Aruba no tin deseo mas pa sigi biba di debe. Lo ta digno di AVP, un partido di hopi trayectoria, pa nan saca un statement bisando den palabranan cla y raspa cu nan "vision" pa Aruba no ta pa sigi crece e debe nacional y cu nan tambe ta para pa un Aruba cu realmente por para riba su pianan.

Un cambio cu pa Partido tradicional lo inserta un cambio di politica populista pa un politica di evolucion y desaroyo sostenibel.

INTERNATIONAL

Mucha di 9 año maltrata y desnutri tin Italia den conmocion

Nunca el a drumi riba un cama

Den un barrio cerca di Napoli na Italia, trahadonan social hunto cu polis a bin descubri un mucha muhe di apenas 9 año, den un situacion inhumano y sumamente penoso, ya cu el a wordo negligisha y maltrata pa su mayornan henter su bida.

Segun e prome informacion di vocero policial, a ser muestra cu e mucha for di momento cu el a nace, nunca pero nunca a drumi den un cama pero riba vloer y tambe su mayornan no tabata dun'e di come regularmente loke e pone cu e ta hopi desnutri.

E mucha tampoco nunca a bay un scol y cu su 9 año ainda e no por papia y e caso ora cu el a bira conoci, a conmove practicamente henter e pais pa tanto sufrimento cu e criatura inocente aki lo a pasa aden na man di su mayornan.

Ta un señora bisiña di e famia a dicidi di bati alarma cu trahadonan social di e ciudad y ora cu a bay haci un control, a bin haya e mucha den e situacion tristo aki y mesora a duna e mucha muhe e nomber di Elsa, cu ta un figura den e popular serie di Disney, esta Frozen.

Mesora Corte di Husticia pa menornan a dreña den accion y a ordena detencion di e mayornan y a dicidi di pone e mucha den un hospital pa mucha pa un periodo di un luna largo mientras cu rumannan di e victima, a wordo poni den cuido di algun famia.

Segun autoridadnan e criatura a wordo negligisha den un forma barbaro, ya cu nunca el a bay scol sin cu esaki a wordo nota pa instancianan concerni, y e impresion ta cu ningun hende a haya su falta y practicamente e no tabata existi.

Dor cu nunca el a drumi den un cama normal, e pover criatura a haya un mal formacion di su columna vertebral loke ta pone cu e mucha no por drumi bon mientras cu tambe dokternan a nota varios fractura na man- y pianan di e pover mucha, ocasiona pa golpinan cu e lo tabata

ricibi.

Segun enfermera nan cu ta tene supervision riba e mucha muhe, e ta muestra contento cu e ta hayando hopi cariño pa prome bes den su bida, cu e ta ricibi amor di tur hende loke a cuminsa trece cambio den su estado di salud.

Mientras cu dokternan ta haya su estado fisico ainda un tiki precario, e pover mucha ta dunando prome señalnan di recuperacion, pero ainda e no por papia pero si ta hari cada rato cu e mira hendenan ta yega cerca dje pa brind'e calor y amor.

Pa muestra con serio e situacion ta, e criatura di 9 año aki ainda no por kauw ya cu e no sa kico esey ta pero e ta wordo alimenta cu cuminda pa baby y otro cosnan moli ya cu tambe e mucha tin cu custuma pa sinti e sabor di tur cos cu e hinca den su boca, ya cu como criatura inocente, e no a haya mucho cos di come.

Parti positivo ta e hecho cu el a cuminsa haya curiosidad na con cuminda normal ta smak y pa dokternan esey ta un tremendo señal.

Con hende por cay di e forma aki? Con mayornan cu pone un criatura inocente riba e mundo aki, por transforma nan mes den un tipo di burdugu pa nan propio sanger, lagando e criatura sin come, lagando e mucha drumi riba vloer pa nuebe año largo.

Cu Dios bendiciona e criatura inocente aki y brind'e un bida yena di amor y bon cuido. Un luna pasa dia 19 di Juli, a sosode un caso similar na Australia caminda a bin haya un mucha muhe di 6 año asina mal nutri, cu e no a logra scapa y a muri despues di a wordo hiba pa hospital y den e caso aki tambe autoridadnan a detene mayornan di e mucha aki.

Koningin Wilhelmina Fonds Aruba: **Charla Ban Preveni Cancer Hunto**



Diasabra 27 di augustus Koningin Wilhelmina Fonds Aruba ta organisa e charla ‘Ban Preveni Cancer Hunto’. Lo tin diferente orador cu lo bin na palabra.

Angelique Salsbach, kende ta nutricionista, lo papia riba nutricion saludabel cu enfoca riba prevencion di cancer. Mirto Tromp kende ta mondhygienist, lo papia riba e importancia di bon cuida oral, no solamente pa prevencion di cancer pero tambe con pa cuida bo boca si bo mester bai haya tratamento pa cancer. Rosetna Martinus ta un transformational & wellness coach y e lo enfoca riba e importancia di movecion y un lifestyle saludabel.

Alabes e fundacionnan cu ta traha duro riba concientisacion pa preveni of trata cancer tambe lo ta presente. Stichting BOB cu ta e fundacion cu ta percursa

pa hende muhernan keda controla nan pechonan regularmente tambe lo duna un presentacion. Mary Joan Foundation cu ta duna guia y ayudo na hende homber y hende muher cu tin cancer na pecho lo ta presente pa asina splica mas di nan trabou. Mamma Poli ta e clinica na Horacio Oduber Hospital special pa personanan cu tin un of otro enfermedad di pecho y nan tambe lo ta presente pa splica riba nan trabou y amplia mas riba e proceso di tratamento medico di cancer di pecho na Hospital.

E mainta di charla lo tuma lugar na Piedra Plat Entertainment Center den Sala Vale Croes y lo tin un duracion di 9.00 -12.00. Entrada ta gratis y tur hende ta bon bini pa asina concientisa nan mes riba cancer y un bida saludabel.

COMUNIDAD

Minister Maduro ta felicita Fundacion Mi Cutisa pa organisa un charla riba e trayectoria di Rignald 'Doble R' Recordino

Un analisis di dr Rene Rosalia riba 50 aña di desaroyo musical



Den e aula di Universidad di Aruba, Fundacion Mi Cutisa a organisa un charla riba e trayectoria musical di Rignald 'Doble R' Recordino. E charla a wordo duna pa dr. Rene Rosalia kende como un antropologo na hermana isla Corsou a investiga e trayectoria musical di Doble R. Durante e presentacion dr. Rosalia a splica riba e nificacion di e trabao musical y balor literario di Rignald Recordino su cancionnan.

Cantica cu contenido y sabiduria popular

Den su trayectoria 'Doble R' a produci mas di 500 composicion. Den cada cantica un cuenta cu ta conta riba aspectonan social di nos sociedad, ta haya bida y ta sirbi di enseñansa popular.

Asina por aprecia un variedad grandi di cantica dedica na e hende muhe, di cual e cantica 'Ta muhe ta manda mundo' ta uno hopi popular. 'Shell Wel Wel' ta un otro cantica popular cu ta conta riba e yegada, estadia y despedida di refineria Shell na Corsou y ta mustra riba e abusonan haci y nan efecto riba e Pueblo di Corsou.

E cantica 'Tula Warda' tambe ta uno cu e mensahe pa nos ta consciente di nos balor como Pueblo y pa nos no sinta bringa otro. Tin e cantica 'Redologia' tambe cu e mensahe ta pa tur hende keda leu di redo. Den hopi cantica sr. Recordino ta manda e mensahe di sabiduria cu Rey Salomon a laga

atras. E aña aki Rignald Recordino mes ta publica un buki di su historia musical cu e letranan di tur composicion cu ela publica.

Recordino ta siña nos aprecia Papiamentu

Cu su piesanan sr. Recordino a siña nos aprecia e uzo di nos idioma natal Papiamentu y mantene e interes den locual ta nos custumbenan. Den su obra 'Esta un dushi lenga,' Recordino ta describi Papiamentu como un idioma creol cu ta hopi interesante, excitante, potente, suave, dushi, bunita, tonal, ritmico, poetico, humoristico, romantico, dramatico, facil, agradabel, flexibel, apreciable y cu un gramatica logico, moderno y facilito. Papiamentu ta completo y pesey ta bale la pena pa nos cuid'e y ta orguyoso semper di nos lenga materna.

Ta gradici Fundacion Mi Cutisa pa nan aporta na conocimiento popular

Minister Maduro ta gradici Fundacion Mi Cutisa pa a organisa e tremendo charla aki unda e fundacion ta aporta na e conocimiento popular di nos Pueblo. E musica y e historia tras di cada cantica di 'Doble R' ta algo unico y ta bale la pena pa wordo conta. Masha danki Fundacion Mi Cutisa y dr. Rosalia pa laga Aruba haya sa mas di e artista, genio literario y musical Rignald Recordino cu ta deleita nos cu su obra nan musical sin igual.

Minister Maduro ta felicita hubilarionan di Departamento di Finansa

Recientemente den presencia di Director di Departamento di Finansa y nan famia, Minister Maduro a felicita e hubilarionan di Departamento di Finansa pa nan servicio na comunidad di Aruba.

Minister Maduro ta felicita y gradici sra. Jolanda Geerman, sra. Sita Geerman y sra. Monica Maduro cu nan 30 aniversario, y sr Karl Vrolijk cu su 25 aniversario di trabao den servicio di Gobierno na bienestar di comunidad.

E mandatario a brinda cada hubilarionan nan Decreto Gubernamental, e envelop cu e gratificacion corespondiente y tambe un regalo pa por conmemora e ocasion importante aki. Sr. Derrick Werleman como Director di Departamento di Finansa tambe a hiba palabra di gradicimento repasando e trayectoria di cada hubilarionan y brindando nan un aprecio di parti di Departamento di Finansa.



Vota pa Organisacion Women empOwering Women!

Pa prome biaha e aña aki, Organisacion Women empOwering Women ta participando den e Wind Creek Challenge pa oportunidad di gana \$40.000! E Wind Creek Challenge tin como obhetivo pa brinda sosten financiero na un organisacion local cu ta yuda nos comunidad door di trabou boluntario.

Organisacion Women empOwering Women a cumpli 5 aña na luna di Juni, unda cu por wak bek na hopi iniciativanan cu a yuda nos comunidad. Nos ta orguyoso di nos miembronan cu a sa di haci uzo di nan mesun abilidadnan, network y recursonan pa asina empodera nan mes y yuda diferente instancianan manera Fundacion Contra Violencia Relacional, Centro pa Desaroyo Aruba, Mothers In Need Aruba, Heart-Centered Leadership Foundation, Orthopedagogisch Centrum, among others.

Si WOW logra gana e competencia, lo sigi desaroya proyectonan unda cu hende muhe hoben profesional por sigi desaroya nan mes den diferente area y asina duna bek na nos comunidad.

Con pa vota pa WOW?

1. Click e link aki:

<https://embedded.wishpondpages.com/lp/2700804/entries/200021352?fbclid=IwAR1>

vYI2XmeY4HVJbxreUn9rYCO8H-Wqvb7gExbiSWAj6-b0KTaoFoTOkfk0

2. Bai den bo email inbox y habri e 'verification email' cu Wind Creek a manda (check bo spam folder si no a ricibi esaki den bo inbox)

3. Click e email pa verifica bo voto y bo ta cla!

Di parti di Organisacion Women empOwering Women nos ta extende nos palabra di gratitud e sosten y apoyo!



COMUNIDAD

Stephen Diaz a dispidi di Caribbean Combo y di su publico

Den e sala di exposicion di Cas di Cultura, e artista musico Arubano Stephen Diaz a presenta dilanti di un publico di amigo-, famia- y fanaticonan. Esaki ta temporalmente e ultimo concierto cu e musico a duna prome cu el a bay sigui su estudionan na Merca. Cu sentimentonan di aprecio, Stephen a introduci e miembronan di e banda Caribbean Combo cua tawata e prome ensamble cu el a join na 2014. E ta e prome drummer di Caribbean Combo. “Den musica, bo no por gaña. Ta un lifestyle esaki ta. Mi a cuminsa cu nan y mi ta gradicinan tambe pa semper”.

Durante di e concierto, Stephen a gradici entre otro su maestro Carlos Bislip pa semper kere den dje y gui’e na exito. Tambe su compañeronan di e banda Caribbean Combo, esta Franklin Granadillo, Alejandro Gonzalez Lujan, Ivan Williams, Denzil Tromp, Ivan Quandus, Andrew Webb y sigur esun mas hoben esta Elai Wester. Tambe Bryan Solognier, Kevin y Elton di Cas di Cultura el a gradici. E anochi tawata acompaña pa cancionnan di ritmo tropical, samba, balada, Jazz y calypso. Algun tema presenta tawata Mambo influenciado, Donaly, Tenderly, Triste, Bilongo y Dubious.



Stephen lo ta studiando na Universidad di Louisiana na Monroe pa su bachelor di arte y musica pa 4 aña. Despues e ta continua su master cu ta 2 aña.

Tur presente a gosa di e concierto y a desea Stephen, hopi exito na Louisiana.





Cambionan den macuto basico 1 september awor

WILLEMSTAD - Diahuebs, dia prome di september proximo, e decreto di Macuto Basico 2022 ta drenta na vigor. Esaki ta ensera, cu e areglo di Macuto Basico anterior ta keda cancela.

Den e areglo di Macuto Basico 2022, gobierno a propone pa amplia e lista di productonan cu ta keda regula pa Gobierno pero alabes hasi adaptacion na e porsentahe maximo di ganashi cu e bendedo por tin riba diferente di e (tipo di) productonan aki. Pues, den e Macuto Basico nobo tin mas tanto producto cu esun anterior y e porsentahe di ganashi pa algun di e productonan existente a keda adapta.

Tene cuenta cu, pa mayoria producto den Macuto Basico, Gobierno ta regula solamente e porsentahe maximo di ganashi tanto por mayor y detal cu e bendedo por tin riba e producto y no e preis final. Ta trata aki di entre otro productonan manera, papel higienico, aros, lechi y algun fruta y berdura.

E unico dos productonan cu ta forma parti di Macuto Basico pero nan preis maximo ta wordo stipula via un decreto separa, ta kipashi di awa y webo di galiña di “legbatterij”. Motibo pa adaptacion di e Macuto Basico existente ta e echo cu, dor di factornan manera e pandemia di COVID-19,

Corsou ta enfrenta na e momentonan aki un crisis financiero y social economico sumamente pisa. Hopi ciudadano a perde trabou durante e periodo aki, cu consecuencia cu casnan tin menos entrada, forsa di compra a baha y ciudadanonan tin mas debe. Gobierno ta premira cu, tanto riba termino cortico como riba termino medio, nos pais lo sigui experencia subida di preis di diferente producto por lo pronto ya como nos ta hopi dependiente di importacon.

E subidanan di preis aki no solamente ta debi na e efectonan di COVID, pero tambe e gera actual entre Rusia y Ucrania, subida internashonal di preisnan di crudo y estorbo den cadena di suministro tin influencia directo riba preis di productonan na Corsou. Gobierno



tin e responsabilidad pa mitiga e efectonan aki mas tanto posibel y zorg pa productonan di prome necesidad keda accesibel pa e consumido y mantene esaki na un preis husto y pagabel, pues a opta pa hasi adaptacionnan na e Macuto Basico. Periodicamente MEO hunto cu SOAW ta evalua e efectonan di e decreto di Macuto Basico 2022 ta bai keda evalua dor di Ministerio di Desaroyo Economico (MEO) y GMN. Si acaso resulta, for di e investigacionnan periodico aki, cu e areglo no tin e efecto desea, MEO, SOAW y GMN conhuntamente lo mester pensa un remplaso pa e decreto di Macuto Basico 2022.

E decreto di Macuto Basico 2022 ta disponibel pa ‘download’ riba www.gobiernu.cw. Pronto MEO ta bai introduci un aplicacion di publicacion di preis, pa yuda e ciudadano tin miho control riba su compras.

Na momento cu e aplicacion aki keda lansa, tur persona por download esaki y haña acceso facil y mobil na preis y informacion di e diferente productonan aki den nos supermercado y minimarketnan local.



Buki di stampia pa celebra Patrimonio Nacional



WILLEMSTAD – Riba diahuebs 18 di augustus CPOST International a hasi entrega oficial di e prome buki di stampianan, crea special pa celebra Willemstad como Patrimonio Mundial, na Minister Charles Cooper como e Minister encarga cu nos Patrimonio.

E buki di stampia ta contene diferente modelo unico di stampia diseña pa nos profesional Eugenique Wilkins, cu alabes ta un colaborado cu ta labora na Servicio pa Planificacion Urbano. Cada stampia tin su nomber y su inspiracion original.

Na e ocasion di entrega, invitadonan a hasi un caminata den nos Centro di Cuidad pa por tuma nota di e diferente sitionan cu a inspira e diseña pa crea e diseña di stampianan. Despues cu Minister Charles Cooper a ricibi e prome buki, e na su turno a entrega un exemplar na Minister van Heydoorn como e Minister encarga

cu Enseñansa, pa e por yuda introduci nos Patrimonio Mundial den nos scolnan. Minister Cooper a entrega un pakete na Minister Ruisandro Cijntje pa esaki Cijntje di su banda, yuda promove esaki como un producto turistico, estilo ‘collectors item’.

Diferente tabata e invitadonan na e ocasion aki den e area di Fluer de Marie, cu a experiencia e bunita ocasion aki.

Entre nan tambe Minister di Salubridad, Sra. Janga, Stichting Monumentenfonds, Stichting Monumentenzorg, y mas. Pueblo di Corsou tambe por cumpra e bunita buki di stampia aki na CPOST International pa asina keda cu esaki como recuerdo di nos Willemstad su 25 aña riba lista di Patrimonio Mundial di UNESCO. E actividad aki a keda organisa den estrecho cooperacion entre VVRP, ROP, y Cpost.



Para mi

*Inteligencia Emocional, Coaching,
PNL, Mind Fullness en español.*

Aceptación Vs Entendimiento

¿Qué es entender y qué significa aceptar? Por ejemplo, ¿qué aceptamos que no entendemos?

Quizás las religiones, las decisiones de los demás, a nuestros seres queridos... ¿Qué entendemos pero no aceptamos? Los comportamientos e ideas de las personas con las que trabajamos, los movimientos revolucionarios, las guerras...

La mayor parte de bloqueos se generan cuando no aceptamos algo, entendiéndolo o no. Entender es un proceso cognitivo y lógico, pero "no todo tiene lógica en ésta vida", aceptar va un poco más allá. ¿No sería más fácil si comenzáramos a tratar de aceptar más y entender menos?

Las dos partes del cerebro cumplen con su función respectiva para estos procesos, pero ¿no sería mejor si ambas partes trabajaran juntas?

¿Cómo sería si dejaras de tratar de entender aquello que te duele y decides aceptarlo? Puede ser una tarea difícil, pero muy liberadora!


¿Qué tal empezar hoy mismo?

Seguro todos habeis escuchado la frase " todo tiene un porque" bueno pues se trata de cambiar la pregunta, y dejar de pensar en PORQUE, abrir nuestra mente y retar al pensamiento y a la razon a contestar mejor la pregunta ¿PARA QUE?

¿No sera mas facil buscar que podemos sacar de bueno, de positivo o simplemente de util, en cada situacion adversa, y no gastar tanto tiempo y energia en tratar de encontrar un porque que solo nos produce frustracion e impotencia?

Hay cosas que no podemos ni controlar ni cambiar, si llegas a ese punto estaras muy cerca del equilibrio emocional y de un nivel de paz muy deseables.

Centra tu mente en el presente, no imagines, no adivines...



¿Cómo llegamos a la aceptación y el entendimiento?
301 views Apr 22, 2020 Aceptar y llegar a entender las cosas "adversas" que nos suceden no es fácil pero sí es posible.

En este video y a través de la historia de Nelson Mandela vemos cómo podemos llegar no solo a aceptar los retos de la vida pero tal vez hasta entender la utilidad detrás de ellos.

Soy Gaby y soy life coach, mama de tres y emprendedora. En este canal la meta es Aprender, Crecer y Llegar a Ser nuestra mejor versión.

El enfoque es enseñar aquellas cosas (habilidades de vida) que NO nos enseñaron en la escuela o la universidad. Hablamos de desarrollo personal, inteligencia emocional, ley de atracción, manejo de finanzas personales, liderar con consciencia, entre otros temas.

<http://www.gabyesquivel.com>

<https://www.facebook.com/gabyesquivel...>

<https://www.instagram.com/gabyesquive...>



Aruba Latino



“

EDITORIAL

Prioridades en seguridad

Los retos en este frente son urgentes y requieren de metas claras en la estrategia.

PARTIDOS POLÍTICOS

1:42 PM

Piden intervención de Uribe y Duque para sacar de crisis al Centro Democrático

COLUMNISTAS

AGO 20 DE 2022

La política internacional de Petro / Columna de Néstor Humberto Martínez

UNIDAD INVESTIGATIVA 6:34 AM

Los datos ocultos de los 4 muertos encaletados en la Toyota blindada

Sicarios de Sanandresito los habrían torturado y asesinado. Carro donde estaban lo tenían abogados.

MÁS NOTICIAS

Empresarios colombianos y venezolanos dirigen su vista hacia la reanudación de relaciones sin fechas concretas

21/08/2022 05:05 pm

Abundan las señales de que la región fronteriza se encamina a una reactivación



EL UNIVERSAL

FORTALEZA PA FAMILIA.

SOLAMENTE DEN CRISTO HESUS TIN SALBACION.

Den ningun otro no tin salbacion, no tin entrada pa cielo si no ta pa medio di Cristo Hesus. (Juan 14:6) Dios a duna su yiu unigenito, pa ken cu kere den dj'E no bay perdi ma tin bida eterna. (Juan 3:16) Esun cu kere den Hesus no ta condena y esun cu no ta kere lo ta condena caba (Juan 3:17). Dios no a manda su yiu pa condena e mundo, ma pa e mundo wordo salba door di dj'E. Esaki ta nifica cu den cualquier estado cu bo bida ta, tin salbacion pa bo.

Con bo ta ricibi Salbacion?

Si bo confesa cu bo boca Hesus como Señor y kere den bo curazon cu Dios a lant'E for di mortonan lo bo ta salba. (Romanonan 10:9). Esaki ta un confesion cu tur hende mester haci asina cu bo tin comprendemento, pa asina pica ya no tin dominio mas riba bo (Romanonan 6:11-16). Si bo keda sin hacie, bo ta bay contra e palabra di Dios y cay bao di condenacion, pasobra bo a rechasa locual Dios a ofrece den Juan 3:16. Tene cuenta cu esaki no ta religion, pero ta e unico opcion cu nos tin di parti di Dios pa asina yega na bida eterna.

Ken tin mester di bida eterna?

Nos tur tin mester di dje, pasobra nos tur a peca, pero Dios no kier pa nos keda biba den pica y inmoralidad, pesey E a manda su yiu Cristo Hesus pa nos salbacion. Tin hende tin hopi curashi pa instrui otro pa no acepta Cristo Hesus y keda manera bo ta, den bo pica, ta hopi tristo ora nos mira con scuridad por domina hende, pasobra pa bo motibo e persona, ta rechasa salbacion. y asina no por drenta cielo. Si un hende ta guia otro pa e caminda di Hesus Cristo cual ta hiba na e Tata, e ta riba e bon caminda. Pasobra hende no por salba hende,, ta solamente Hesus Cristo por. Pasobra cu curason hende ta kere pa haña husticia, y cu boca e ta confesa pa haña salbacion, (Juan 10:10) aki nos ta nota cu salbacion ta algo personal, cu cada persona tin cu tuma e decision. Ken cu kere den Señor lo no keda brongosa, Señor nunca lo bandona nos. No ta importa ken bo ta, pasobra pa medio di fe den Hesus nos ta salba. Dios no ta discrimina ningun hende, tin hende ta discrimina nan mes door di engaño diabolico,

Pasobra si e palabra di Dios ta bisa: Bin serca mi tur cu ta cansa y carga y lo mi duna boso sosiego, (Mateo 11:28) esey ta conta pa tur hende, pero esnan cu no kier sali for di scuridad pa lus semper lo keda sconde tras di nan excuus. E palabra ta bisa lo siguiente: Pasobra esun cu ta haci maldad ta odia e lus, y no ta bin na e lus, pa su echonan no wordo exponi, pasobra e stima scuridad (Juan 3:19+20).

Salbacion ta inclui arepentí, confesa y aparta. Awor kico tin mas balor pa bo?, Un bida den inmoralidad y pica? Un bida yena cu malicia, infidelidad, violencia, vicio y mentira? Un bida sin ningun speranza? Of un bida den boluntad di Dios, caminda bo sa cu bo ta salba y bo sa cu si bo wowo mester sera, ta den brasa di Papa Dios bo ta bay sosega. Salbacion ta solamente pa medio di Cristo Hesus.

“Señor ta mi Wardador, mi’n tin falta di nada; Den kunuku di yerba berde, E ta pone mi sosega. E ta hiba mi na awa trankil, pa mi bolbe haña forsa. E ta guiami den caminda drechi fiel na su number.”

Salmo: 23

Cu hopi tristesa, pero conforme cu boluntad di Dios,

Nos ta anuncia fayecimento di:



Odette Tincel

*9 December 1938 - † 18 Augustus 2022

Acto di entierro lo wordo anuncia despues

Sinceramente, Pastor Marcel Balootje.

Gradicimento y Invitation

Nos kier a manda un palabra di gradecimento pa tur cu a yuda nos y sostiene nos durante su enfermedad y despedida di nos tata stima Emiterio Arends q.e p d.



Emiterio Arends

Mihor conoci como: "Theo"

*03 Maart 1931 - †14 Augustus 2022

Danki na tur famia, amigo, colega, conocir y bisinja nan,

Tambe nos kier a gradici pa e bon cuida na dr Horacio Oduber Hospital; E specialistanan dr Selene Kock y dr Carolina Becker; E enfermeronan di piso 4; Su dr di cas cu tawata semper attent, dr Melissa Wever: Specialista dr Jason Petronilia; Enfermeronan di Wit Gele Kruis.

Alaves nos kier a invita pa tres Santo Sacrificio di Misa

Cual lo tuma lugar na Misa Sagrado Curason na Savaneta pa 7 or di anochi

E fechanan lo ta

Diasabra: 20 Augustus 2022

Dialuna: 22 Augustus 2022

Diasabra: 27 Augustus 2022

Boso presencia lo ta altamente aprecia.



Aruba Airport Authority N.V.

ta anuncia fayecimento inespera di nos colega y amigo

Carlos Alberto Rojer

na bida nos Director Internal Audit



Nos ta desea Michelline, su juinan, ruman nan y demas famia, amigo y coleganan

hopi forsa den e periodo dificil aki.

Cu Carlos por sosega na paz.

Royal Pray
Aurora
Funeral Home & Crematory

PA LESA FULL OBITUARIOS, WAK WWW.AWEMAINTA.COM/OBITUARIOS

**“Señor ta mi wardador, mi’n tin falta
di nada Den cunucu di yerba berde e
ta ponemi sosega. E ta hibami na awa
trankil, Pa mi bolbe haña forsa”.**

Salmo: 23

Nos ta anuncia fayecimento di:



**Dionisia
Josephina Helder**

***12-12-1939 -
†15-08-2022**

Tur cos aki na mundo tin su ora y su tempo,
Ora pa nace y ora pa muri, ora pa yora y ora pa
hari, Ora pa keda keto y ora pa papia, ora pa stima
y ora pa odia, Ora pa guerra y ora pa paz”

Predicador 3:1-2-4-7-8

**Cu dolor na nos curason, nos ta participa
fayecimento di nos ser stima:**



Sra. vda. Theresa Krosendijk-Kock

**Cariñosamente yama “Theresita”
*08-02-1930 - †17-08-2022**

“Señor ta mi wardador, mi’n tin falta di nada

**Den cunucu di yerba berde e ta ponemi
sosega. E ta hibami na awa trankil,**

Pa mi bolbe haña forsa”. Salmo: 23

Nos ta anuncia fayecimento di:



Maxima Ras

***15-05-1940 - †17-08-2022**

**“SEÑOR TA MI WARDADOR, MI’N TIN FALTA DI
NADA. DEN CUNUCU DI YERBA BERDE E TA PONEMI
SOSEGA. E TA HIBAMI NA AWA TRANKIL, PA MI BOLBE
HAÑA FORSA”. SALMO: 23**

Conforme cu boluntad di Dios y gradecido na loke el a
haci y nifica pa nos, nos ta participa fayecimento di:



Sr. Jan Hendrick Tromp

***03-10-1954 – †18-08- 2022**

Acto di entierro lo wordo anuncia despues.